



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Ven. Viri Thomæ Malleoli A Kempis, Canonici Regvlaris  
Ordinis D. Avgvstini. Opera Omnia**

**Thomas <von Kempen>**

**Dvaci, 1625**

Qvinta. In nocte natiuitatis Christi, de quærendo paruulo Iesu.

[urn:nbn:de:hbz:466:1-45790](https://nbn-resolving.org/urn:nbn:de:hbz:466:1-45790)

fui amorem accenderet, & à cunctis terrenis extraheretur. Ut nobis lumen daret sapientiæ, & tenebras fugaret ignorantia. Ut nos vnum secum efficeret, participes regni, filios gratiæ, confortesque æternæ gloriæ. O gloriosa lux, de Patre nata. O inclyta Dei sapientia, de virgine hac nocte præcreata. Da deuotè ac dignè tibi gratias agere. Da nomini tuo altissimè psallere, reuerenter inclinare, humiliter genu flectere, honorificè adorare, atque cum Angelis sanctis gloria in excelsis, tibi solemniter decantare. Te enim decet laus & honor Domino, qui pro nostra salute dignatus es incarnari. Amen.

## Q V I N T A.

*In nocte natiuitatis Christi, de quarendo parvulo Iesu.*

I. **Q** Verite Dominum, dum inueniri potest: inuocate eum, dum *hinc ss.*  
*propè est.* Surgite vniuersi Christi fideles, concurrite ad hanc solemnitatem dominicæ natiuitatis. Adest namque nox sacratissima, in qua redemptor mundi Iesus Christus, nasci voluit de gloriosa Virgine Maria. Surgite igitur omnes, & vigilate: præparate corda vestra, & orate. Dominus venit, venite, & adorare. Querite Iesum, & inuenietis: pulsate ad ostium, & aperietur vobis: intrate domum, & videbitis. Rex noster aduenit, Christus natus est nobis. Venite, adoremus & procidamus ante eum: quia ipse est, qui fecit nos. Venite Angeli & Archangeli, cantate, & exultate, & psallite. Gaudete iusti in Domino, hymnū dicite Deo nostro, annuntiate inter Gentes opera eius. Dominus nobiscum, nolite timere. Venit Deus in carne, nobiscum est humanitate, qui nusquam deest diuinitate. Venite paruuli & magni, senes & gradui, iuuenes & virginis; cantate Domino canticum nouum, quia mirabilia hodie fecit. Leuate corda vestra cum manibus ad cælum, & super omnem exultationem date gloriam laudi eius. Dominus nobiscum, nolite contristari. Induite vos electi Dei vestimentis iucunditatis & lætitiæ: abijcite opera tenebrarum, & induimini arma lucis: sicut in die clara, sic in nocte hac sancta vigilemus, Gaudeamus & exultemus, cantemus & hymnizemus, iubilemus Deo salutaris nostro. Offeramus ei vota nostra, præbeamus illi oris nostri obsequia. Dominus nobiscum, nolite recedere, nolite attediari: sed stete viriliter, & psallite ei alacriter.

2. Quis potest iam dormire, quando Angeli cantant in cælo, & vox laudis resonat in excelsis? Quis maneret in strato suo, quando omnes gestiunt esse cum Iesu in iubilo? Quis nõ surgeret hac nocte

nocte cū desiderio, quando omnia videntur esse in gaudio? Propterea gaude & lætare filia Sion, iubila Hierusalem: quia hodie pax vera descendit de cœlis, ad pacificandum, & instaurandum, quæ in cœlis sunt, & quæ in terris. Hodie lux vera illuxit super terram, vt omnem hominem illuminaret in se credentem. Hodie facta est lætitia magna in Israël, quia natus est Christus in Bethleem. Hodie per totum mundum mellisui facti sunt cæli, quia ex ore doctorum emanant sermones suauissimi; vnde recreantur infirmi, consolantur deuoti, instruuntur ignari, excitantur pigri, animantur fideles, & confunduntur increduli.

3. Hodie exultant Angeli, lætantur Archangeli, & omnes iusti in deuotione sunt & gaudio spiritali. Hodie nox conuersa est in diem & claritatem magnam, quia exortum est in tenebris lumen rectis corde, misericors & miserator Dominus. Sit nox ista in perpetuum benedicta, & inter dies solennes computata. Benedicant ei, qui benedicere solent dici: & laudent eum omnes filij lucis, quia natus est in ea Christus filius Dei, lux æternæ lucis. Non sit hæc nox solitaria, nec à laudibus aliena. Non sit obscura, sed illustretur lumine desuper, atque in vniuersa Ecclesia accendantur luminaria multa. Nil in ea pratereatur, quod ad decorem eius pertinet: sed vsque ad ortum surgentis auroræ, laus eius perseueret. Cumque dies inclaruerit, luceat sol iustitiæ, qui natus est in cordibus omnium se amantium: & rursus noua oriatur deuotio, in mentibus omnium celebrantium. Dies sanctificatus hodie illuxit, gaudeant omnes fideles; quia Deus olim prædixit; Fiat lux, & facta est lux. O verè beata nox, veri luminis illustra natali, atque Angelicis adornata fulgoribus: quorum canticis & laudibus, gaudiosior effecta est cunctis per orbem fidelibus. O verè beatissima nox, clarior omnibus seculi noctibus, quæ scire meruit tempus & horam, quando de virginali vtero, egressus est Dei filius, nostræ fragilitatis corpore indutus. O sacra & illibata natiuitas, quam dedit virginalis sæcunditas. O supra naturam sæcunditas, quam ornauit virginea puritas; & summa elegit maiestas, vt saluaretur humana mortalitas. O benedicta & gaudiosa natiuitas, quæ maledictionem primorum parentum nostrorum, in cælestem conuertit benedictionem; & eorum mœrorem, in gaudium mutauit sempiternum. Meritò hæc nox venerabilis est, & amabilis omnibus hominibus; in qua Christus nasci dignatus est, pro omnibus liberandis.

4. Benedicta sit ergo sancta Trinitas: cuius bonitate & consilio, hominis dignitas est reparata, & diaboli decepta calliditas. Benedico te Pater cælestis, qui dilectum filium tuum ad nostram redemptionem in mundum misisti. Benedico te Fili Dei vnigeni-

te Iesu Christe, qui propter nos homines redimendos, naturam nostram assumpstisti. Benedico te Spiritus sancte paraclete, qui cuncta redemptionis nostrae sacramenta, ab initio vsque ad finem, gloriosè & mirificè perfecisti. Sit tibi infinita laus & gloria, sit honor tibi & imperium, ô summa sempiternaque Trinitas; cuius prouidentia & ordinatione, facta est nobis tam iucunda & solempnis festiuitas. Amen.

## S E X T A.

*De deuota uisitatione nati pueri Iesu.*

**I.** **N**VM, quem diligit anima mea, vidistis? Vobis loquor Angeli sancti: dicite mihi de Iesu meo, quod nostis. Vbi est paruulus, qui natus est nobis? Indicate mihi, què diligit anima mea. Quòd si mihi indicare non vultis, dicite saltem per eos, quos dignos iudicaueritis. Vobis loquor pastores, dicite mihi de Iesu meo, quod nostis. Vbi est paruulus, qui natus est nobis? Quid annunciauit vobis Angelus? *Annuntio* (inquit) *vobis gaudiū magnum, quia natus est vobis hodie saluator, qui est Christus Dominus in ciuitate Dauid.* Et quod vobis signum dedit? *Inuenietis* (ait) *infantem in pannis inuolutum, & positum in praesepio.* Et quid cantauerunt Angeli sancti? *Gloria in excelsis Deo cantauerunt.* Et post hæc, quid vos fecistis? Statim cum festinatione & gaudio trāsuiimus vsque Bethleem, & inuenimus Iesum in praesepio iacentem. O mi, quid audio; quàm dulce est & iucundum, quod percipio. Sufficit mihi modò: vadam, & videbo hunc puerum, antequam moriar. Expectate tamen paulisper, ibo vobiscum, & hospitium vnum erit omnium nostrum. Et vos Angeli Dei omnes concurrite, & recto itinere ad praesepe Christi me perducite.

2. Aperite mihi Ioseph & Maria, aperite ostium dilecti mei: ut ingressus tabernaculum eius, adorem sancta vestigia eius, Omnes reges terræ desiderabant videre faciem Salomonis, & audire sapientiam eius, *& ecce plusquam Salomon hic.* Sinite ergo me introire, ut deosculer scabellum pedum eius. Hic est enim de quo praloquuti sunt Prophete, quem annuntiauerunt Angeli, quem uisitarunt pastores alacres & deuoti. Hic est, quem quero, quem amo, quem videre desidero.

3. Quid trepidas anima mea? Clama, pete, pulsa, donec aperiat tibi ianua. Ingredere locum tabernaculi admirabilis, vsque ad domum Dei. Accede fiducialiter, & iunge te paruulo recens nato cordialiter: quia nō abiciet te nec fugabit, sed silēter admittet, & gratiā suam tibi ostendet. Ne timeas à facie vagiētis in praesepio, plangit tua peccata, non sua incommoda. Venim enim te quærere, non perdere. Venit te saluare, non iudicare. Venit te soluere,

non